

《妙法蓮華經》卷7〈25 觀世音菩薩普門品〉

御製觀世音普門品經序

觀世音菩薩，以爍迦羅心（爍迦羅，乃精進、堅固之義。又爍迦羅眼，謂金剛眼、堅固眼，即指明定正邪、辨別得失之眼。）應變無窮，自在神通遍遊法界，入微塵國土說法濟度，具足妙相弘誓如海，凡有因緣發清淨心，纔舉聲稱，即隨聲而應，所有欲願即獲如意。妙法蓮華經普門品者，為度脫苦惱之真詮也。人能常以是經作觀，一念方萌，即見大悲勝相，能滅一切諸苦，其功德不可思議。朕惟天道福善禍淫，故佛示果報，使人為善而不敢為惡。夫天堂、地獄皆由人為，不違於方寸之內，故為善者得升天堂，為惡者即墮地獄。夫忠臣孝子吉人貞士，其心即佛，故神明庇佑，業障俱泯，是以生不犯於憲條，沒不墮於無間。夫兇頑之徒，一於為惡，棄五倫如敝帚，蹈刑法如飲甘，寧餒羅剎，不飲佛道。然人性本善，所為惡者，特氣質之偏；苟能改心易慮，修省避畏，轉移之間惡可為善矣。為善則即善人，昔之所積之咎，如太空點塵、紅鱸片雪，消滌淨盡，雖有果報將安施乎？朕恒念此，惟恐世之人有過而不知改，乃甘心焉以自棄，遂表章是經，使善良君子永堅禁戒之心，廣納無量之福，為善功德豈有涯涘哉！

據民國 圓瑛法師《妙法蓮華經觀世音菩薩普門品講義》

「觀世音」，是菩薩號；觀，音灌ㄍㄨㄢˇ，非眼觀，而是以智觀。觀，乃能觀之智；世音，乃所觀之境。能觀之智則同，而所觀之境，當分菩薩因中之自利，及果上的利他，乃度生之大用兩種解釋。據本經則為果上利他立名。

「普門」：

又作無量門。意指普及於一切之門。天台宗認為，法華經所說之中道、實相之理，即遍通於一切，無所壅塞，故諸佛菩薩乘此理，能開無量之門，示現種種身，以拔眾生苦，成就菩提。又以此為根據而有「十普門」之說，即：慈悲普、弘誓普、修行普、斷惑普、入法門普、神通普、方便普、說法普、成就眾生普、供養諸佛普等十普門。依此可順序完成自行化他之德。又佛、菩薩依種種緣，顯示其種種形相，而來救度眾生，稱為普門示現。

「十普門」：

周遍之圓法，能通入實相，計有十法，稱為十普門。即：(一)慈悲普，眾生緣、法緣、無緣之三慈中，僅無緣之慈悲與實相同體，普遍一切任運相應，故以無緣為慈悲普。(二)弘誓普，無作四諦能收一切法，故依之發弘誓，名弘誓普。(三)修行普，依次第而行五行（聖、梵、天、嬰兒、病）謂之不普；若不依次第而行，一行即如來行，謂之普。(四)斷惑普，用一切智、道種智斷四住及塵沙之惑，如切枝條；若以一切種智斷無明除五住，則如除根本，故謂之普。(五)入法門普，二乘能了別諸地之定有淺深差別，僅中

道王三昧不起滅定，含攝一切之三昧，故指入中道王三昧為入法門普。(六)**神通普**，羅漢、辟支佛之神通，其緣境偏狹；若緣實相而修，方為真神通，一發則一切發，故謂之普。(七)**方便普**，證悟實道以前之方便不謂之普，僅自證實道以後化用之方便能逗機利物，一時圓遍，故謂之普。(八)**說法普**，能以一妙音應十法界之機，隨其宜而令得解脫。(九)**成就眾生普**，無量之眾生遍滿十方之法界，時時能潤益之。(十)**供養諸佛普**，能以一切供具身命財，普遍供養十方諸佛。此即中道實相之理遍通一切，無所壅塞，故諸佛菩薩乘此理，能開無量門，示現種種身，以拔一切眾生苦，成就菩提。初五普為自行，次三普為化他，後二普兼自行、化他兩意。〔法華經文句卷十下、觀音經玄義卷下、法華玄論卷十〕

甲、正文分三

乙初、長行別示、二、偈頌合顯、三、聞品獲益 初分二

丙一、問答得名所以、 丙二、問答遊化方便 初又二

丁一、當機舉名請問 丁二、如來備示感應分二（此同楞嚴十四無畏）

丁一、當機舉名請問

爾時，無盡意菩薩即從座起，偏袒右肩，合掌向佛，而作是言：「世尊！觀世音菩薩，以何因緣名觀世音？」

丁二、如來備示感應分二（此同楞嚴十四無畏）

戊一、正答得名所以 二、廣顯稱名感應

初又三：己一、總標尋聲救苦 二、別示持名感應 三、結答得名因緣

己初、總標尋聲救苦

佛告無盡意菩薩：「善男子！若有無量百千萬億眾生受諸苦惱，聞是觀世音菩薩，一心稱名，觀世音菩薩即時觀其音聲，皆得解脫。

己二、別示持名感應

若有持是觀世音菩薩名者，設入大火，火不能燒，由是菩薩威神力故。若為大水所漂，稱其名號，即得淺處。若有百千萬億眾生，為求金、銀、琉璃、[磤磤碼碼]車璩、馬瑙、珊瑚、虎珀、真珠等寶，入於大海，假使黑風吹其船舫，[漂]飄墮羅剎鬼國，其中若有，乃至一人，稱觀世音菩薩名者，是諸人等皆得解脫羅剎之難。以是因緣，名觀世音。

戊二、廣顯持名感應分四

己一、能脫四難 己二、能離三毒 己三、能應二求 己四、能得多福

初中二 庚一、別明脫離 二、總結神力 今初

若復有人臨當被害，稱觀世音菩薩名者，彼所執刀杖尋段段壞，而得解脫。(一

難)若三千大千國土，滿中夜叉、羅刹，欲來惱人，聞其稱觀世音菩薩名者，是諸惡鬼，尚不能以惡眼視之，況復加害。(二難)設復有人，若有罪、若無罪，桎械、枷鎖檢繫其身，稱觀世音菩薩名者，皆悉斷壞，即得解脫。(三難)若三千大千國土，滿中[冤]怨賊，有一商主，將諸商人，齎持重寶、經過[險]嶮路，其中一人作是唱言：『諸善男子！勿得恐怖，汝等應當一心稱觀世音菩薩名號。是菩薩能以無畏施於眾生，汝等若稱名者，於此怨賊當得解脫。(四難)』眾商人聞，俱發聲言：『南無觀世音菩薩。』稱其名故，即得解脫。

二、總結神力

無盡意！觀世音菩薩摩訶薩，威神之力巍巍如是。

己二、能離三毒分二 一、別明離毒 二、總結 神力

若有眾生多於婬欲，常念恭敬觀世音菩薩，便得離欲。若多瞋恚，常念恭敬觀世音菩薩，便得離瞋。若多愚癡，常念恭敬觀世音菩薩，便得離癡。

二、總結神力

無盡意！觀世音菩薩、有如是等大威神力，多所饒益，是故眾生常應心念。

己三、能應二求分二

庚一、別明應求

若有女人，設欲求男，禮拜供養觀世音菩薩，便生福德智慧之男，設欲求女，便生端正有相之女，宿[植]殖德本，眾人愛敬。

二、總結神力

無盡意！觀世音菩薩有如是力。

己四、能得多福分

庚一、勸持較量

若有眾生，恭敬禮拜觀世音菩薩，福不唐捐，是故眾生皆應受持觀世音菩薩名號。

無盡意！若有人受持六十二億恒河沙菩薩名字，復盡形供養飲食、衣服、臥具、醫藥。於汝意云何？是善男子、善女人，功德多不？」無盡意言：「甚多，世尊！」

佛言：「若復有人受持觀世音菩薩名號，乃至一時禮拜、供養，是二人福，正等無異，於百千萬億劫不可窮盡。」

庚二、結顯多福

無盡意！受持觀世音菩薩名號，得如是無量無邊福德之利。」

丙二、問答遊化方便分二 丁一、當機進問遊化 丁二、如來備示感應分二

無盡意菩薩白佛言：「世尊！觀世音菩薩，云何遊此娑婆世界？云何而為眾生說法？方便之力，其事云何？」

丁二、如來備示感應分二 戊一、廣顯應化諸國 戊二、正答遊於娑婆

初中二 己一、明應顯化 己二、結德勸供

初中又八 庚一、能應三聖

佛告無盡意菩薩：「善男子！若有國土眾生，應以佛身得度者，觀世音菩薩即現佛身而為說法。應以辟支佛身得度者，即現辟支佛身而為說法；應以聲聞身得度者，即現聲聞身而為說法。

庚二、能應六天

應以梵王身得度者，即現梵王身而為說法；應以帝釋身得度者，即現帝釋身而為說法；應以自在天身得度者，即現自在天身而為說法；應以大自在天身得度者，即現大自在天身而為說法；應以天大將軍身得度者，即現天大將軍身而為說法；應以毘沙門身得度者，即現毘沙門身而為說法。

庚三、能應五人

應以小王身得度者，即現小王身而為說法；應以長者身得度者，即現長者身而為說法；應以居士身得度者，即現居士身而為說法；應以宰官身得度者，即現宰官身而為說法；應以婆羅門身得度者，即現婆羅門身而為說法。

庚四、能應四眾

應以比丘、比丘尼、優婆塞、優婆夷身得度者，即現比丘、比丘尼、優婆塞、優婆夷身而為說法。

庚五、能應眾婦

應以長者、居士、宰官、婆羅門婦女身得度者，即現婦女身而為說法。

庚六、能應二童

應以童男、童女身得度者，即現童男、童女身而為說法。

庚七、能應十類

應以天、龍、夜叉、乾闥婆、阿修羅、迦樓羅、緊那羅、摩睺羅伽、人非人等身得度者，即皆現之而為說法。

庚八、能應力士

應以執金剛身得度者，即現執金剛身而為說法。

己二、結德勸供

「無盡意！是觀世音菩薩成就如是功德，以種種形，遊諸國土，度脫眾生。是故汝等，應當一心供養觀世音菩薩。

戊二、正答遊於娑婆分二 己一、顯示妙德 己二、應回結答

初中三 庚一、能施無畏

是觀世音菩薩摩訶薩，於怖畏急難之中能施無畏，是故此娑婆世界，皆號之為施無畏者。」

庚二、能感供養

無盡意[8]菩薩白佛言：「世尊！我今當供養觀世音菩薩。」即解頸眾寶珠、瓔珞，價直百千兩金，而以與之，作是言：「仁者！受此法施珍寶瓔珞。」時觀世音菩薩不肯受之。無盡意復白觀世音菩薩言：「仁者！愍我等故，受此瓔珞。」

庚三、能修供養

爾時佛告觀世音菩薩：「當愍此無盡意菩薩及四眾，天、龍、夜叉、乾闥婆、阿修羅、迦樓羅、緊那羅、摩睺羅伽、人非人等故，受是瓔珞。」即時觀世音菩薩愍諸四眾，及於天、龍、人非人等，受其瓔珞，分作二分，一分奉釋迦牟尼佛，一分奉多寶佛塔。

己二、應問結答

「無盡意，觀世音菩薩有如是自在神力，遊於娑婆世界。」

乙二、偈頌合顯分（此頌什師不譯，後來諸師皆謂梵本中有故依隋本補入）

丙一、重答得名所以 丙二、合顯得名遊化

爾時無盡意菩薩以偈問曰：

「世尊妙相具，我今重問彼，佛子何因緣，名為觀世音？」

丙二、合顯得名遊化分二 丁一、顯得名所以 丁二顯遊化方便

初中三 戊一、總標 戊二、別顯 戊三、總結。

戊一、總標

具足妙相尊，偈答無盡意：汝聽觀音行，善應諸方所，弘誓深如海，歷劫不思議，侍多千億佛，發大清淨願。我為汝略說，聞名及見身，心念不空過，能滅諸有苦。

戊二、別顯 分二 己一、能免三災

假使興害意，推落大火坑，念彼觀音力，火坑變成池。或漂流巨海，龍魚諸鬼難，念彼觀音力，波浪不能沒。

己二、能脫八難 分四、庚一怨賊刑戮難

或在須彌峯，為人所推墮，念彼觀音力，如日虛空住。或被惡人逐，墮落金剛山，念彼觀音力，不能損一毛。

或值怨賊繞，各執刀加害，念彼觀音力，咸即起慈心。
或遭王難苦，臨刑欲壽終，念彼觀音力，刀尋段段壞。

庚二、枷鎖毒藥

或囚禁枷鎖，手足被杻械，念彼觀音力，釋然得解脫。
呪詛諸毒藥，所欲害身者，念彼觀音力，還著於本人。

庚三、羅刹惡獸難

或遇惡羅刹、毒龍諸鬼等，念彼觀音力，時悉不敢害。
若惡獸圍遶，利牙爪可怖，念彼觀音力，疾走無邊方。

庚四、毒蟲暴雨難

虻蛇及蝮蠍，氣毒煙火燃，念彼觀音力，尋聲自迴去。
雲雷鼓掣電，降雹澍大雨，念彼觀音力，應時得消散。

戊三、總結

眾生被困厄，無量苦逼身，觀音妙智力，能救世間苦。

丁二、顯遊化方便分二 戊一、廣顯應化諸國

具足神通力，廣修智方便，十方諸國土，無刹不現身。
種種諸惡趣，地獄鬼畜生，生老病死苦，以漸悉令滅。
真觀清淨觀，廣大智慧觀，悲觀及慈觀，常願常瞻仰。
無垢清淨光，慧日破諸闇，能伏災風火，普明照世間。
悲體戒雷震，慈意妙大雲，澍甘露法雨，滅除煩惱焰。

戊二、正顯遊化娑婆

諍訟經官處，怖畏軍陣中，念彼觀音力，眾怨悉退散。妙音觀世音，梵音海潮音，勝彼世間音，是故須常念，念念勿生疑。觀世音淨聖，於苦惱死厄，能為作依怙，具一切功德，慈眼視眾生，福聚海無量，是故應頂禮。」

乙三、聞品獲益分二 丙一、持地稱揚

爾時持地菩薩即從座起，前白佛言：「世尊！若有眾生，聞是觀世音菩薩品自在之業，普門示現神通力者，當知是人功德不少。」

丙二、時眾發心

佛說是普門品時，眾中八萬四千眾生，皆發無等等阿耨多羅三藐三菩提心。」